

SMU lancarkan biasiswa khusus bagi mahasiswa

PUBLISHED ON NOVEMBER 12, 2015



Dr Yaacob Ibrahim (tengah) bersama penerima biasiswa Muhammad Hafiz Kasman (dua dari kiri), Nur Amalina Saparin (bertudung) dan Khairul Ashraf Khairul Anwar (dua dari kanan). (Gambar: SMU)

SINGAPURA: Tiga mahasiswa Melayu dari Universiti Pengurusan Singapura (SMU) menjadi penerima perintis bagi Biasiswa Cemerlang MERCU-SMU yang pertama kalinya ditawarkan dan dilancarkan pagi tadi oleh Menteri Bertanggungjawab bagi Ehwat Masyarakat Islam, Dr Yaacob Ibrahim.

Biasiswa tersebut adalah hasil sumbangan dana \$600,000 oleh MERCU Learning Point serta seorang karyawan pelaburan kanan Singapura dan pegawai bank kanan tempatan.

Keseluruhannya, biasiswa bagi mahasiswa SMU itu bernilai \$1.2 juta, dengan pemerintah menokok setiap dolar yang dikumpul.

Menghasilkan para pelajar yang bukan sahaja cemerlang dalam bidang akademik tetapi juga prihatin terhadap kebajikan dan nasib masyarakat.

Itulah antara matlamat biasiswa sulung yang dikeluarkan bersama oleh SMU dan MERCU, pagi tadi.

"Satu kerjasama yang penting yang menunjukkan semangat untuk berkongsi dan pada masa yang sama menolong mereka yang kurang berkemampuan tapi menunjukkan prestasi yang baik dan saya rasa permulaan ini satu yang baik.

"Saya harap lebih banyak akan tampil ke hadapan untuk menolong bukan hanya murid-murid di institusi seperti SMU atau NUS tetapi juga pelajar-pelajar kita di madrasah dan sebagainya bagi menolong sebanyak mungkin anak-anak Melayu kita menerajui bidang-bidang yang mereka inginkan ke tahap lebih tinggi," jelas Dr Yaacob Ibrahim.

Tambah Dr Yaacob, biasiswa tersebut sekali gus menjadi lambang kesediaan dan kerjasama yang harus dicontohi oleh badan-badan Melayu tempatan yang lain.

Publication: Berita Mediacorp

Date: 13 November 2015

Headline: SMU lancarkan biasiswa khusus bagi mahasiswa

"Inisiatif biasiswa ini bermula dengan perbincangan antara AMP dan SMU dan kemudian dengan MERCU. Bagi MERCU, inisiatif ini memberi peluang bagi kami menyumbang kepada masyarakat," jelas Pengerusi MERCU Learning, Mohd Azmi Muslimin.

Tiga penerima pertama Biasiswa Cemerlang MERCU-SMU masing-masing menerima pembiayaan bernilai \$12,000 setiap tahun, mulai tahun akademik tahun ini.

Antara lain, dana tersebut membantu melangsaikan yuran sekolah penerima serta kos-kos lain berkaitan pengajian mereka.

"Saya sudah dipilih sebagai calon daripada SMU untuk menghadiri program penukaran atau lebih dikenali sebagai 'exchange programme' di University of New South Wales untuk semester akan datang, tahun depan. Oleh itu, saya akan menggunakan wang biasiswa ini untuk membiayai kos-kos pembelajaran di sana," ujar Nur Amalina Saparin, Penerima Biasiswa MERCU-SMU.

"Saya rasa saya seorang pelajar yang telah dan sentiasa mencari cara untuk memberi balik kepada masyarakat dan biasiswa ini akan lebih menggalakkan saya untuk terus memberi balik kepada masyarakat," jelas Muhammad Hafiz Kasman, seorang lagi Penerima Biasiswa MERCU-SMU.

Biasiswa Cemerlang MERCU-SMU diberikan khusus bagi mahasiswa Melayu Singapura SMU yang sedang mengikuti pengajian sepenuh masa tahun kedua hingga tahun keempat.